



SIARAN AKHBAR

KEMENTERIAN KESIHATAN

PERUTUSAN

YANG BERTAMBAH
DATO SERI SETIA DR HAJI MOHAMMAD ISHAM BIN HAJI JAAFAR
MENTERI KESIHATAN
SEMPENA SAMBUTAN HARI KESIHATAN SEDUNIA 2024

07 APRIL 2024

TEMA:
“KESIHATAN SAYA, HAK SAYA”
(*My Health, My Right*)

1. Hari Kesihatan Sedunia disambut setiap tahun pada 7 April dengan tema yang berbeza-beza. Pada tahun ini, tema sambutan Hari Kesihatan Sedunia 2024 ialah “Kesihatan Saya, Hak Saya (*My Health, My Right*)”. Tema ini memfokuskan kepada isu ancaman terhadap kesihatan yang dialami oleh berjuta penduduk diseluruh dunia pada masa ini yang memberi impak negatif terhadap kesihatan. Ini termasuk peningkatan kes-kes penyakit dan bencana yang menyebabkan kematian dan ketidakupayaan, pencemaran udara, konflik politik yang memusnahkan kehidupan, menyebabkan kematian, kesakitan, kelaparan dan tekanan mental atau psikologi yang tinggi.
2. Menurut Pertubuhan Kesihatan Sedunia, pencemaran udara menyebabkan kadar kematian yang membimbangkan iaitu kira-kira 1 kematian pada setiap 5 saat. Pembakaran bahan api fosil dan

pengeluaran karbon yang tinggi yang berterusan mencemari bumi dan beransur-ansur meragut hak manusia untuk menghirup udara segar dan hidup tanpa pencemaran.

3. Kesihatan adalah hak asasi setiap individu dimana setiap orang mempunyai hak untuk mendapatkan perkhidmatan kesihatan yang berkualiti, terbaik, mudah diakses pada bila-bila masa dan di mana jua ia diperlukan tanpa dibebani dengan isu kewangan mengikut prinsip Liputan Kesihatan Sejagat atau *Universal Health Coverage (UHC)*. Prinsip Liputan Kesihatan Sejagat ini menjanjikan perlindungan kewangan dan akses kepada perkhidmatan kesihatan asasi yang boleh mengelakkan terjadinya kemiskinan dikalangan masyarakat, menggalakkan kesejahteraan keluarga dan masyarakat serta melindungi dari krisis kesihatan awam.
4. *The WHO Council on the Economics of Health for All* telah mendapati sekurang-kurangnya 140 buah negara memperakui kesihatan sebagai hak asasi manusia di dalam perlembagaan mereka. Namun ianya tidak dipraktikkan melalui penguatkuasan atau pelaksanaan undang-undang untuk memastikan rakyat dan penduduk mempunyai akses kepada perkhidmatan kesihatan. Ini terbukti pada hakikatnya, bahawa sekurang-kurangnya 4.5 bilion penduduk - lebih dari separuh penduduk dunia tidak mempunyai akses penuh kepada perkhidmatan kesihatan asas dan penting pada tahun 2021.

5. Justeru itu, tema Sambutan Hari Kesihatan Sedunia bagi tahun 2024 “Kesihatan Saya, Hak Saya (*My Health, My Right*)” dipilih untuk memperjuangkan hak setiap penduduk dimana jua untuk mendapatkan akses kepada perkhidmatan kesihatan, pendidikan dan informasi yang berkualiti, termasuk juga akses kepada bekalan air yang bersih dan selamat, udara yang bersih, makanan yang mengandungi zat, perumahan yang berkualiti, persekitaran bekerja yang baik dan bebas dari diskriminasi.

6. Negara Brunei Darussalam adalah merupakan salah sebuah negara di Rantau Pasifik Barat yang mempunyai indeks Liputan Kesihatan Sejagat (*Universal Health Coverage*) yang tinggi dengan sistem kesihatan yang kukuh berlandaskan Penjagaan Kesihatan Asasi yang komprehensif dan disalurkan melalui perkhidmatan komuniti yang berkesan mengikut kawasan tedahan yang meliputi seluruh pelusuk negara sebanding dengan negara-negara maju seperti Jepun dan Singapura. Pelaburan Kerajaan dalam memastikan penjagaan kesihatan yang berkualiti kepada seluruh rakyat dan penduduk di negara ini telah terbukti berkesan yang diukur melalui pencapaian status kesihatan mengikut petunjuk-petunjuk yang digariskan di bawah Matlamat Pembangunan Mampan (*Sustainable Development Goals*) seperti kadar kematian anak damit, liputan imunisasi bagi kanak-kanak, akses kepada ubat-ubatan dan rawatan, dan pelaburan bagi program-program pencegahan dan pemulihan.

7. Liputan Kesihatan Sejagat memberikan sinar harapan ke arah

kesaksamaan yang menjanjikan kesihatan dan kesejahteraan bagi semua tanpa mengira status sosial dan ekonomi dan ianya mempunyai prinsip untuk memastikan tiada seorang pun yang terabai dari hak mendapatkan perkhidmatan kesihatan. Walau bagaimanapun, untuk mencapai Liputan Kesihatan Sejagat, ia bukan sekadar mengembangkan liputan perkhidmatan, akan tetapi ianya memerlukan tranformasi dalam sistem penjagaan kesihatan dan memerlukan pendekatan inovatif, dasar dan peraturan yang kukuh, pelaburan yang berdayatahan untuk membina sistem kesihatan yang teguh dan inklusif bagi memenuhi evolusi keperluan penduduk di Negara Brunei Darussalam dan juga di seluruh dunia.

8. Untuk mengakhiri, pada Hari Kesihatan Sedunia ini, kita sewajarnya memperbaharui komitmen terhadap prinsip keadilan dan kesaksamaan dalam kesihatan dan bekerjasama merentas sektor dan sempadan untuk membangun sistem kesihatan yang inklusif tanpa diskriminasi. Penjagaan kesihatan yang kita hulurkan kepada rakyat dan penduduk bukan hanya semata-mata sebagai kewajipan moral, malah ianya adalah pelaburan strategik bagi masa depan bersama. Dengan memberikan akses kepada penjagaan kesihatan, kita mampu menyerlahkan potensi manusia, merangsang pertumbuhan ekonomi dan membina masyarakat yang teguh dan inklusif.

-TAMAT-